

臺

省

疏

稿

皇省疏稿卷之五

請調將官東征疏

臣初至地方節奉

聖旨令臣督率巡撫李佑總兵湯克寬等徑速
發兵剿滅叛賊以靜地方嚴督進剿聞據
僉事張士純周舜岳等呈開賊勢恣橫無
忌官軍屢被挫折皆由將領不得其人又
據三司熊汝達等各稱須調取廣西總兵
官俞大猷前來庶克有濟臣竊議曾一本

者止一點賊逼挾良民縱肆為盜向使將
領有司處置得宜豈遽猖獗至是總兵官
湯克寬身膺重任輕率寡謀始則撫處失
策致復背叛繼則避難東嚮遙制雷瓊以
致各官不肯齊心併力失律喪師損威玩
寇坐失機宜自干法典今本官雖奉

明旨革任而罪狀未明尚有遺議除候進剿收
功之日通查湯克寬與叅將魏宗瀚王如
澄等情罪另行酌議具題外臣惟賊勢

方熾撲剿之議選將為急新任廣東總兵
官一時推補未至看得鎮守廣西地方總
兵官署都督同知俞大猷素負威名久諳
戰陣設策出奇料敵制勝衆心推服當此
緊急用人之際委宜暫行調用且廣西地
方警報稍緩所議征進古田尚須設處糧
餉未可猝舉臣除遵照

勅諭便宜處置事理一面行令俞大猷挑選標
下慣戰官兵隨帶馳赴軍門聽臣計議方

畧暫令前去帶管廣東總兵官事務以將
廣西總兵事宜已行柳慶參將王世科暫
理外其克寬前項失事緣由罪不止於革
任仍合責令戴罪立功以圖自贖伏乞

勅下兵部再加查議聽臣責成總兵官俞大猷
前去會同巡撫廣東都御史李佑處置應
用何項兵船應募何項勁兵應辦何項器
械整擗齊備親臨彼中隨賊向往與海南
海北等道兵備官督責原任總兵湯克寬

及叅將魏宗瀚王如澄都指揮等官白翰
紀李茂材朱相等振肅兵威懸立賞格務
將劇賊曾一本等克期殲滅以靖海隅有
功之日容臣特與題

請錄用若新任總兵官至日亦令馳赴軍中協
謀共事功成之日俞大猷仍回本鎮其戴
罪各官果能奮激致身衝鋒破敵准與議
贖庶妖氛有蕩滌之期海邦慰寧謐之望
矣

剿平流賊報捷疏

據廣東按察司管伸威兵備事按察使張子私呈奉總督軍門憲牌并巡撫衙門案據本道會同潮州兵巡道僉事蹇來譽呈查得流賊楊子亮李竹山何元妹丘宗堯等原係潮州府程鄉揭陽等縣蛇坑黃寨等巢餘黨先年夥同已獲大賊首李春文藍松山楊平溪等為盜嘉靖四十四年前賊陸續剿平子亮等仍糾集張顯宙鄒子

勝陳良揚子周揚子清等三千餘徒流毒
興寧長樂等縣地方殺擄人口攻打城寨
以黃寨賊首蘇繼相康和巢賊首江漢秋
溪巢賊首劉興策為聲援彼此交通日益
猖獗法在必誅備仰各職及潮州兵備道
僉事蹇來譽各親詣軍前監統官兵務將
前賊剿捕盡絕以靖地方等因依奉督兵
進剿該潮州府捕盜通判潘槐程鄉縣知
縣洪敷言督率官鄉撫兵生擒賊犯揚子

清張廷舉龍必祥等二十七名斬獲首級
一十九顆奪獲牛三頭馬一匹各哨官兵
遵照巡撫軍門尅定師期于隆慶元年十
一月初九日辰時開刃申嚴號令依期齊
進左哨遊擊馬良匯督率官兵行至興寧
縣中堡地方適遇各賊出劫當督名色把
總周雲翔陳忠典史林天賜等官兵與賊
交鋒生擒賊甲賊從謝金孫等二名奪回
被擄男婦二十三名口餘賊退回健橋寨

悉衆出敵右哨原任叅將今報效梁高亦
督官兵繼至四面夾攻血戰二十餘合賊
勢敗衄二哨官兵當陣斬級五十八顆奪
獲賊旗十一面長鎗十二根救出被擄男
婦六百餘名口各官衆風縱火燒燬各賊
寮房八百餘間焚死賊徒無數楊子亮即
同何元妹等移遁湖葦地方遊擊馬良匯
等督率名色把總桑九虎典史林天賜千
總江大勝朱憲等官兵於十三日追及到

彼楊子亮當即放銳開旗率衆迎敵我兵
奮勇大戰當陣生擒賊總李竹山賊甲賊
從共三名斬級七十八顆俘獲賊屬九名
口奪回被擄男婦二十五名口各賊遁在
軍營屯劄我兵尾擊斬級一十九顆十八
日又在地名雙頭交戰斬級二十六顆楊
子亮仍帶黨與遁入芹菜湖大山據險拒
敵該本道懸以重賞鼓舞三軍衆兵踴躍
挺身赴戰總兵官湯克寬督左右二哨官

兵於二十七日寅時由貴人村壩灘下
崖附葛而進自卯至申鏖戰數十餘合各
賊大敗當陣生擒賊總賊從何元妹丘宗
光鄒子勝張顯宙范曰文等一百零三名
斬級二百六十八顆俘獲賊屬三十九名
口奪回被擄男婦五十二名口奪獲賊馬
六匹賊旗十六面烏銃四門力鎗盔甲共
千六件鞍轡器械米飯鍋帳等物盡為各
兵所奪尚遺顆賊數百餘徒遁往揭揚縣

翁溪山見兵追逼勢愈窮蹙將所帶賊屬
婦女幼男盡行殺死丟棄仍砍竹作槍以
拒我師十二月初三日各哨官兵追擊至
彼有哨官陳恩陳世孔張遜等衝鋒直前
餘兵以次繼進復行大戰就陣生擒賊總
賊從陳良薛子正等一百三十三名斬級
一百五十九顆俘獲賊屬四十一名口奪
回被擄男婦四十二名口奪獲牛三頭馬
一匹賊旗十面標槍十二件腰刀六把仍

遺楊子亮等未獲隨督總兵標下原任福
山把總今報效姜旦中軍千戶吳憲督兵
生擒楊子亮嫡兄楊子周賊總何文清等
共七名俘獲楊子亮正妻余氏二妻張氏
三妻鍾氏共三口楊子亮等遁往程鄉縣
銅鼓嶂官兵尾擊有夥下書總鍾臣鄒惟
六探覷得楊子亮伏藏所在潛投總兵官
湯克寬審實帶兵追殺至十七日辰時各
兵追及楊子亮仍恃兇悍手執篋笏率衆

迎敵各兵血戰至申時在於梅磔豹子凹
有名色把總張明星千長吳伯元等首先
斬獲大賊首楊子亮并將伊弟四妻殺死
又名色把總湯大源督兵斬獲旗頭李大
總首級一顆當令隨哨鄉導陳香等及投
來夥賊鍾臣鄒惟六識認的係楊子亮身
屍原帶銀手鐲二箇金簪二根當即砍取
首級一顆餘賊逃散有大埔縣大麻社千
長余宗全等督兵截殺生擒敗賊陳貴勳

陳九子二名斬級三顆海陽縣潘田巡檢
司督率千長陳文敵等擒獲賊犯陳二子
王繼子二名揭陽縣兵夫陳光張大喬等
生擒從賊劉子清等二名斬級四顆奪獲
賊婦一口總共斬獲有名大賊首功級一
顆生擒賊總賊從共二百七十一名斬獲首
級共六百三十五顆通共擒斬獲九百零
七名顆俘獲賊屬男婦九十三名口奪回
被擄男婦一百四十二名口奪獲賊馬八

一
匹牛六頭賊器械贓物共八十七件陸續
陣亡兵夫三十八名被傷八十九名看得
首惡就戮餘黨蕩平地方可望安堵但恐
一二漏刃殘孽潛藏山谷及投各圍寨偷
生仍委長樂縣典史林天賜及行興寧程
鄉海陽等縣巡捕官逐一設法查搜盡絕
以防後患除獲解至日另報外但照此賊
既滅其餘蘇維相等巢亦皆望風歛戢告
招且發兵之時二道遵照委官入巢坐鎮

俱不敢黨附助惡今海賊曾一本未除似
宜暫示招安專力海上徐為後圖等因到
臣卷查先據惠潮二府并興寧程鄉等縣
申報前賊於嘉靖四十五年八九月內陸
續突劫各縣地方如興寧之黃沙賽龍川
之新田鄉長樂之七都程鄉之石坑都虞
塘下赤朱坑陳坑窯口等處地方連破程
鄉等縣楊塘石坑長東二坑駱岐青龍長
灘北廟等圍寨逼城劫殺縱橫無忌右倚

卽譚綸巡撫右僉都御史李佑批行查議
去後續據呈稱楊子亮李竹山等內有二
千餘徒乃各巢驍雄極惡之黨夥助子亮
出劫陰分贓物况多江閩各處投入技藝
之流演禽布陣無不備知方今嶺東各巢
山賊居處有定流劫不出二三十里惟楊
子亮糾集各巢兇徒原無定巢屯劄東擊
西奔依憑三窟之狡流劫七縣之間官兵
甫進則復散遁附近巢穴神出鬼沒姦險

萬狀若不及早撲滅禍愈莫測茲欲進剿
必須多調軍兵董以大將副之偏裨四面
夾攻庶克有濟緣由前來維時正遣叅將
魏宗瀚等統率舟師進剿海賊曾一本而
楊子亮等乃乘機倡肆以撓我師出攻興
寧縣城池軍民赴告急求援總兵官湯克
寬正督標兵三千六百名屯劄海豐又該
前任總督巡撫衙門隨行總兵官湯克寬
就近帶兵督剿仍添調官兵分為左右二

哨左哨委廣東遊擊將軍馬良匪統督把
總曾德久長樂所百戶孟津長樂縣典史
林天賜官兵二千七百六十員口為一枝
從長縣梓臯進廣州右衛指揮王照領典
寧官鄉撫兵二千名為一枝從興寧縣水
口進惠州衛指揮吳學顏張榮名色把總
王鸞惠州衛百戶湯勛等領伸威道團操
等兵三千五百名為一枝從龍川縣田心
石背進右哨委原任叅將今報效梁高統

督惠州衛指揮李會龍闈常名色把總魯
太平莊以臨等各領程鄉平遠二縣民壯
撫兵三千名為一枝從程鄉南口進仍委
管伸威兵備事按察使張子弘監督并委
按察司潮州兵備道僉事蹇來譽部領名
色把總易大源等操兵一千名赴哨夾剿
又委布政司糧儲道叅議許公高總理糧
餉惠州府同知唐德瑞潮州府通判潘槐
分理餉務臨軍催督平遠知縣魏世熙程

鄉知縣洪敷言揭揚縣知縣李仕各處辦
軍需督兵把截要路及照例約會巡按御
史王同道紀驗功次糾察姦弊并令各道
差官坐守黃寨等巢夥賊不許黨附去後
今據前因臣除將生擒賊犯發回問招通
詳首級解巡按衙門紀驗被擄給親領回
賊屬牛馬發賣取價充賞器械改充兵用
其黃寨等處巢賊既未合夥海事未寧且
又乞招已經安插儻再枯終不改侯機另

處外臣會同巡撫右僉都御史李佑議照
流賊楊子亮李竹山等倚恃諸巢黨附招
集醜類猖狂攻劫所至被其荼毒頃乘官
兵西擊海賊即分哨出掠大肆兜殘各縣
村寨莫不騷動若不亟行剿滅為害將日
益甚今幸將領協謀軍士用命既先誅其
黨與尋已殲其渠魁一方之積患頃除萬
姓之宿憤稍洩是皆仰仗

皇上 聖化昭明 天威震奮 蠢茲小醜 宜不

足平如此也謹具題 知

叅廣東失事疏

據廣東按察司整飭兵備分巡海北道僉事張士純呈稱先奉行委監督舟師進剿海賊曾一本等自隆慶元年十一月二十一日在雷州東場海面失利叅將繆印把總俞尚志被執之後該本道行查損失官兵船隻名數據肇慶府同知郭文通呈報查得叅將魏宗瀚王如澄原領兵船在雷

州剿賊三大哨官兵總計八千四百八十
二員名除陣亡溺水及病弱革回外見在
四千九百七十九名戰船一百四十五隻
見在八十隻數目前來并據本道及統督
叅將署都指揮僉事魏宗翰王如澄各呈
稱職等將原領兵船收在雷州府南渡港
內整頓以圖再舉自本年十二月初六日
至二十五日節次交鋒攻打互有殺傷本
月二十九日夜半各賊盡數突至港內連

接兵船鏖戰數百餘合矢石銳砲交攻如雨打沉賊船三隻傷死賊徒數多餘賊又駕白艚以刺胡盡數合來抵死拒戰至黎明偶值大霧天色昏翳又復南風助逆被賊奪據我營時守備李茂材李節二船居前獨當其衝血戰良久銳矢俱盡力不能支當被先焚李茂材身中銳彈打死其百戶杜鈺等亦多被傷生死未知下落兵夫止各存十數人我兵披靡已無鬪志陸續

奔逃叅將魏宗瀚且戰且却漸近城南僅
以身免致賊又將兵船焚燒兵夫千餘名
次日據福兵高亞三自賊中走回報稱各
賊連日被我兵打死三百餘人俱扛屍上
岸焚燒賊首曾一本大腿被大銃彈子打
傷重其餘被傷者各船俱有二三十人賊
今尚在雷州海面遨遊待南風便方回潮
州等因到臣查得接管卷內先該兵備僉
事等官蹇來譽等各呈稱海賊曾一本等

挾詐稔惡流毒邊海法在必誅已經前任
總督譚綸會本題請一面備行巡撫軍
門調取柘林守備李茂材碣石寨把總朱
相白鴿門寨把總俞尚志南頭哨指揮林
清柯繩武趙陸千戶王綽等兵船行委叅
將魏宗瀚王如澄統督海方兵備僉事蹇
來譽監督進剿又調烏兔白沙二寨把總
王正中陶俊兵船委叅將繆印統督海北
兵備僉事張士純監督先于白鴿門等處

堵截總兵官湯克寬總督剿殺續據叅將
魏宗瀚等呈報曾一本因兵船擁逼於隆
慶元年十月初七日在碣石鶯洲掛帆西
遯又據海北僉事張士純等呈報前賊於
本月二十二日突至雷州過沆遯走緣由
前來又經通行追剿外續該臣於本年十
二月二十六日赴鎮經臨肇慶府即行會
廣東巡撫衙門行帶管巡視海道僉事周
舜岳通行署都指揮僉事白瀚紀掌新會

縣印韶州府同知揚繼宗督同指揮伍惟
統募取慣諳水戰兵夫五千名及行催在
省打造海南道大小戰船二十六隻市舶
提舉陳誥打造大烏船四隻哨馬中船十
隻刷雇烏白艚橫江船六十隻仍備火藥
軍器俱已次第齊備適總兵官俞大猷前
到軍門臣即咨訪計議令其前去會同巡
撫廣東都御史李佑酌處如用閩兵即差
委能幹官員前往閩省添募戰船隻擇

選精勁兵士審度機宜設策進剿去後今
據前因臣除行海北道兵備僉事張士純
備查前項賊徒再犯逼近郡城復致失事
係何官兵臨陣先退先將故違軍令正犯
緝解軍門處治及查實傷損官兵船隻另
行具奏外臣議照海賊曾一本乃吳平
遺孽素習兇悍狡黠尤甚出沒波濤流毒
閩廣先年盤據深澳兩省合師進剿被真
潰圍逸出自後陽順陰逆屢招復叛積惡

既久脅從漸多焚劫鄉村擄集船隻抗拒
王師執辱將吏勝則默聚長驅敗則鳥散飄
忽瞬息千里莫可追襲各官又任地方熟
知情狀自當運謀竭力計出萬全乃今總
統則驕恣偃蹇偏裨復疑畏遠巡竟致喪
師罪何可追參照原任鎮守廣東總兵官
湯克寬叨膺闕帥坐失機宜先事不能伐
賊之謀殃民已甚臨敵殊無制勝之畧玩
寇滋多且驕橫生於得志之餘而奸避靈

於臨難之日方以搏山中之狐兔謂可掩
蓋其愆不思縱海上之鯨鯢實乃自貽其
戚既無率先士卒之義何有身殉 國事
之忠督理海防叅將魏宗瀚分守惠潮叅
將王如澄各膺分守之任俱乏統馭之才
調遣逗遛奮迅之氣已却臨陣退縮將士
之心不孚彼此不相應援處同舟之誼不
思共濟利害不知趨避陷必死之地何以
圖存但偷一己之生不顧三軍之命喪師

失律傷重損威以上三臣者罪當從重其
湯克寬雖有剽平山寇之功難準其過似
應先取死罪招由責限以圖後功者也領
哨把總俞尚志王正中朱相陶俊指揮柯
繩武趙陞林清千戶王綽等或遇敵而畏
怯不前或奉調而愆期不赴均有從征之
責難逃愆事之愆所當併究者也廣東按
察司海北道僉事張士純賊臨治境雖切
保障之心職任監一兵未效協謀之績雷州

府海防同知林燦船泊南渡去城伊適始
失預防之周繼乏贖理之策皆屬有罪亦
宜併究者也及照巡撫廣東右僉都御史
李佑徵兵轉餉設策運籌焦勞不為不勤
急切未臻成績非緣不敏實處其難已經
節奉 欽依行令戴罪策勵供職無容再
議如蒙伏乞 勅下兵部再加查議合無
通將失事叅將魏宗瀚王如澄先行革職
備行巡按廣東監察御史將魏宗瀚王如

澄與湯克寬俱取死罪招由在案責成滅賊贖罪如再不效竟坐重典其把總指揮等官俞尚志等責任稍輕亦先行革去冠帶克為事官與僉事張士純同知林焯俱戴罪殺賊候事寧之日分別功罪各另議處其巡撫都御史李佑仍令戴罪容臣再行督責後效與俞大猷協心併力必滅此賊該省原議請給軍餉錢糧亦乞俯從查處以濟緊急庶威信嚴明兵食充

足黥賊有成擒之日矣

請留總兵官再疏

臣竊惟兩廣自昔多盜山徭海寇往往流
毒地方征剿殆無虛歲蓋種類積習難馴
而時下尤為狂恣乃至有如曾一本者乍
降輒叛出海縱橫抗拒王師執辱將領
本以巨寇吳平餘黨踵襲狡悍習知虛實
剽掠漸多自去歲及今勢甚猖熾致塵
聖皇注念屢降綸音命臣督率剿滅臣入境

之初隨據廣東按察司海北兵備僉事張士純報稱前賊突至雷州海面登岸劫掠於隆慶元年十一月二十一日該統督叅將魏宗瀚王如澄等率領舟師與賊交鋒失利被賊燒燬戰船據執叅將繆印等緣由前來看得賊勢方張我軍氣怯撲剿之議選將為急舊任湯克寬既奉旨革任新任總兵官又推補未至一面先行調取廣西總兵官俞大猷馳赴軍門聽臣計

議督發前去庶幾東地方與巡撫都御史李佑整備兵船置辦器械火藥等項以圖進剿一面具本題請去後隨據俞大猷呈報應辦兵船數目并酌議大烏艚舡大福船哨馬舡隻選過見在官兵軍器火藥等項仍慮兵舡尚欠合用福兵及白艚舡隻行仰廣東布政司支銀責委魏宗瀚等領赴該省雇募皆已定議施行與諸凡征進事宜逐一措置漸有次第惟俟兵舡集日

舉事其間緩急操縱運用之權悉屬之大
猷方喁喁幾望功成有期矣近聞兵部侍
郎譚綸以為京營團練宜得大猷共事具
本欲乞 召用彼其同心共濟安內攘外
之意誠忠謀也在臣豈敢以此嶺海小醜
必欲挽留一將以妨大計但此時諸路將
士既已傾心服其指揮海洋桀驁亦皆憚
威屢乞招撫作三軍之敵愾安萬姓之憂
危士民洵洵惟恐其去况在誓師申令之

時有臨敵易將之忌揆諸事勢誠不可
令其去也且大猷生長海濱熟知水戰雖
忠義性成韜畧素具無往不利迺若江海
帆檣從容應變奮迅於波濤震蕩之中一
時將領信無能出其右者即使新總兵至
亦豈遽能諳地利得人和如此臣展轉感
惟萬不得已乃敢冒昧上陳伏乞軫
念遐方安危所係勅下兵部再加查議
合無將總兵官俞大猷暫留廣東令其殫

竭心力專意滅賊其新任郭成至日亦令
與之協謀共事督責將士務將曾一本等
剿虜盡絕功成之日即令應命赴京
聽用其廣西總兵官應否先行推補或事
畢仍令回鎮本省聽征古田以終巡按御
史朱炳如原建之議俱聽兵部查議施行
廢上紆九重南顧之憂下慰邊海生民
之望地方幸甚臣等幸甚

請釋閒宅廢人疏

先准禮部咨內開煩查該省閒宅內拘禁
廢人邦萬先前所犯情罪重輕及何年月
日入宅是否久遠有無可矜即今拘禁有
年曾否悔悞逐一查明如果例應釋出即
同巡按會奏前來以憑題請定奪至於
奏內乞要嚴加防範已經本部題奉欽
依通行外合行查照着實舉行等因備咨
前來據廣西按察司會同都布二司守巡
等道左布政使等官陳慶等會查得閒宅

庶人經責孟生俱犯該拒捕持刀傷人及
夥賊強盜財物積惡深重約造四次越關
屢違 明禁素行橫暴民怨切骨經排收
禁在逃持刀傷人經怙誘引同行憑籍規
利潛踪肆出略無忌憚以上四庶恣行貪
暴蔑視 憲章至今粵西宗衆倚勢凌虐
朋比恣淫紛紛效尤日甚一日皆此輩為
之作備防微杜漸仍當禁錮終身為 宗
藩不法者之戒又查得一名邦篤原犯私

出鎮未過百里尋即追回較之屢次越
關過惡顯著者誠為有間雖無改過之驗
似有悔心之萌近該 本玉題 請釋放

情委可矜又邦革越 奏降度係家人劉
享撥置已經問遣仲生依附同宗連名瀆
擾彼時年尚幼小見惑於人邦篡代父越
奏款蓋前愆自權於罪約等附和為非擅離
封境以上四廢雖拘禁遠近不同而心迹
似與邦為俱情可矜應同奏 請款奉

赦典一體釋放至於關防一節先年立法本
嚴近頗弛廢不守合行申飭以銷意外之
虞等因呈報前來臣會同巡按廣西監察
御史朱炳如議照間宅之設專以懲抑干
犯法典宗室今當聖政維新之會
正衆庶創艾之期所據庶人經畫孟生犯
該盜情約造約踏經排經恣事干屢犯冲
生拘禁未久俱不敢輕議照舊禁錮外其
庶人邦篤出城未踰百里既經靖江王

邦葦具奏乞一安釋出而邦葦等援例具告
前來俱經三司官會勘明白邦葦邦養約
哼俱係初犯且為他人撥置及代奏附和
情犯似輕孽非已作今邦葦邦葦俱禁一
十二年邦養約哼俱禁三年以上比與臣
原任鳳陽巡撫題釋高橋廢人陸楹等事
同一體於情委屬可矜相應題請 寬宥
及照原設間宅初議 王府差委內官旗
校有司差委捕盜官員內外防禁仍封閉

宅門五日一啓巡風火役晝夜守護不許
私自出入交通外人防範頗周適因群宗
搆怨以致衆庶乘機蔑視毆辱官校法紀
蕩然任其自便肆無忌憚若非申飭將來
踵襲如舊難免地方之害除行長史司啓
王仍舊嚴督內官旗校協同有司捕盜官兵
務令晝夜扃閉內外巡守鎖鑰仍行分巡
桂林道掌管每遇五日委今按察司首領
官員督同前項官校如期開放水米等項

完即高鎖如有疎怠縱容出入分巡該道
即將經該員役徑自查叅呈究其各庶人
凡有染疾及喪葬父母患難是雖人子至
情悉皆啓 王量事緩急聽其區處有司
亦不得擅自干預各庶人如有仍前不聽
鈐束違法踰越者聽 本王徑自懲戒或
叅 奏罰住口糧或送發高墻如此則事
權有屬防範無虞地方幸甚

擒獲賊首疏

據廣東按察司整飭兵備兼分巡潮州道
僉事蹇來譽呈稱惠潮大賊首林金先年
糾同各巢黠賊為患節被官兵征剿金性
狡猾遂得逃刃自集已獲賊總黎尚德龔
三蠻等二千餘徒劫掠惠州等府地名烏
潭義容等處圍寨殺擄人民盤據上松坑
為巢隆慶元年五月內該伸威兵備道通
呈奉總督撫按衙門督發官兵攻破巢穴
擒斬獲黎尚德等解報林金帶領殘黨數

百徒遁往海豐縣南嶺東溪寨地方仍勾
賊黨行劫官兵追及剿殺止遺林金十數
人潛行奔走隨奉督撫衙門憲牌仰道懸
示重賞設法緝捕必獲首惡解報以絕盜
源依奉督行潮州府知府楊承閔同知胡
廷順選差民壯郭賓董和楊貴等分投著
落惠來等縣撫民巢內查諭計擒彼林金
得知附投海豐八萬峒賊首饒棉峯等一
千餘徒流劫普寧縣泥洋徑口寨地方本

道即督官兵剿捕各賊隨就逃散惟有林
金等又逃往惠來縣南洋寨撫民曾仕龍
巢內納降曾仕龍因見前諭諄切與梅林
寨千長官守正欲拿獲立功託佃人巫子
榮馳赴哨官李文甫於本年十二月十六
日引赴該府投詞當即給與榜文着落曾
仕龍計擒又督名色把總謝恩等前去高
浦等寨起集千長蔡守興等兵一千名會
同名色把總陳儒等募兵三百名移住南

洋以作聲援本月二十七日李文甫等督
同曾仕龍并頭目黎德范仁等將林金拿
獲解報到道研審得林金供係惠州府海
豐縣金錫五都人嘉靖三十八年內合同
已剿賊首花腰蜂即五端為盜號稱大總
後五端就誅金又糾同已剿殺賊首葉卅
樓蘇均用鄭奇山等打劫惠潮二府地方
金親手殺死二十餘人復同被擒賊首王
西橋等前往廣州府東莞縣地方劫掠被

兵殺敗金自立為都總糾黨打劫各處圍寨殺人放火繼被大兵攻破巢穴剿滅徒黨金脫走惠來撫巢被獲等情據此為照賊首林金流毒三府地方播惡已非一日敵殺軍兵殘害百姓乃者潛身逃遁禍根未除仰仗軍門指授方畧恩威並用以致撫民效力不煩一餉首惡就擒士庶歡欣所據有功官員相應叙賞以酬其勞及照林金驍雄極惡酋長殺人數多所宜亟正

典刑用洩民憤等因呈報到臣案查先據
伸威兵備道及惠州府等衙門呈申拜歸
善等縣申稱漏網賊首林金龔三蠻等糾
集黨與據險為巢陸續分哨剽劫歸善長
樂等縣洋烏潭上下石等處地方攻圍破
寨殺死生員譚大緒軍民張大惠諸松矩
等數百餘命擄去男婦潘應科梁氏等逼
銀贖放懇兵征剿解民倒懸等情該前任
提督侍郎吳桂芳會同巡撫廣東都御史

李佑督調官兵分定哨道行委都指揮白
翰紀統督伸威兵備按察司張子弘監督
進剿已將巢穴掃蕩擒斬獲賊犯黎尚德
楊子清龔三蠻等共三百零三名顆俘獲
賊屬一百二十五名口奪回被擄男婦七
名口奪獲賊旗器械一百七十二件馬六
匹牛三十一頭獨遺賊首林金未見俘獲
續該臣接管看得前項地方雖已平寧而
賊首漏刃恐餘燼復燃又經會行嚴督各

道府縣官員多方緝訪購擒解報去後今
據前因臣會同巡撫都御史李佑議照賊
首林金嘯聚為盜擁衆焚劫始於惠潮之
間延蔓東莞等處肆惡無忌雖大兵屢加
而變詐莫測遂為出柙之虎茲者該道府
官同心協力設策運謀以致撫民用命无
惡就擒一方之禍本既除百姓之積憤已
洩是皆仰仗我

皇上

聖德覃敷

天威遠布之所致也除將

有功官員聽巡按御史併勘另議其兵夫
撫民量行犒賞賊首林金發按察司會審
明白遵照兵部題准嚴法令以靖地方
事例押赴市曹處決如法判屍以洩民憤
外謹具題知

會議軍餉征剿古田疏

據廣西布政司呈奉臣案驗准兵部咨該
兵科抄出巡按廣西監察御史朱炳如題
前事備仰本司將應剿古田地方會議合

用兵糧事宜具由通皇詳奪依奉該本司
掌印右佈政使周儼會同三司各官議得
古田巨賊據三鎮十里為巢穴連八寨為
聲援越省城劫藩庫戎方面歛王門誠
覆載之所難容真神人之所共憤且該縣
官吏師生僑寄省中編戶齊民流移他處
垂六十年竟自執迷豈一朝夕所能招撫
近該主簿廖元深入彼中名雖護印實則
為質且不惟該縣之土地人民不復得見

大日而鄰境鄉村無日不遭劫擄之苦省
城官司無夜不畏窺伺之姦蓋天將殄其
種類故先厚其兇霍此正數窮理極之時
大征之舉在所不容已也除合用大小哨
官兵器械等項及善後之計已該總兵官
俞大猷條論詳悉至於選將調兵嚮導偵
謀分布信地各里專職凡一應進止機宜
攻守長策候舉事之際再行酌議外所有
糧餉一節如總兵俞大猷揭稱先發銀兩

前去湖廣蘄永等處糴米合用銀四萬兩
右江府江二道各銀五千兩左江道買馬
肆百匹約銀四千兩及懸賞格置軍器等
項尤不下數萬兩今司帑被劫之後止有
馬價銀八百三十八兩專備地方買馬大
征其餘多係解京錢糧即 宗室祿米軍
糧且不敷一季支放已經另詳呈乞議處
而今欲動大衆興大役雖盡括解京錢糧
其何能措給萬分之一也查得嘉靖三十

四年總督浙直都御史張經周琬胡宗憲
先後題借去兩廣軍餉銀共二十萬兩止
還過銀三萬兩尚有一十七萬兩未還三
十七年該巡撫四川都御史黃光昇題借
去兩廣軍餉銀三十萬兩訪聞彼處見有
十萬五千兩未動夫浙直四川素稱財賦
之藪一旦用兵採木尚欲別省協借矧廣
西地瘠民困朝不謀夕今欲剿除數十年
之逋賊發紆數十年之積忿一時軍餉之

需何從取給伏乞 疏

請轉行三省撫

按查將前借銀兩差官解還本省及多方
預處克足以備分投委官辦集前項諸費
聽候臨期舉事等因到臣案查先准兵部
咨該本部題准鎮守廣西總兵官征蠻將
軍署都督同知俞大猷手本內稱廣西古
田縣去府僅百餘里田土縣治盡被撞賊
占據已經五六十年弘治年間襲殺副總
兵馬俊叅議馬鉉正德年間攻陷洛容縣

嘉靖四十三年十二月越入省城劫去庫銀數萬兩叅政黎民衷被害四十四年八月復越省城被官兵挫退若不亟行盪定則古田陸沉永不可復今應議處進剿機宜約計共調廣西土官目兵及雇募烏銃手等軍兵十萬員名分派七大哨用監督司道官七員統督將領官七員又分三十八小哨用指揮三十八員千百戶七十六員監統進剿該本部看得俞大猷痛悞窮

允議行征討仍湏借調湖貴等兵併力夾
攻乞行計議合用糧餉或於浙江四川兩
省取回原借軍餉不敷乞於 內帑給奏
緣由相應議處合候

命下移咨新任總督張瀚會同巡按御史朱炳
如備將前項征剿事宜再加從長會議停
妥會本具 奏等因具題節奉

聖旨是欽此欽遵備咨到臣已經業行會議去
後隨又查得嘉靖三十四年內當兩廣無

事之日該總督浙直都御史張經周琬胡宗憲題行戶部備咨前提督兩廣侍郎譚愷行廣東布政司借支軍餉銀二次銀二十萬兩嘉靖三十七年又該巡撫四川都御史黃光昇題行工部備咨前提督兩廣侍郎王鈞行廣東布政司議支銀共三十萬兩差官解送四川布政司協濟採木之用至嘉靖四十一年內前右都御史張臬訪聞川貴解木事完前銀未曾支用題

請發還廣東濟用隨准戶部咨報前銀俱已
各項取用並無補還嘉靖四十四年又該
前提督侍郎吳桂芳見得用兵缺餉具

題取還前銀該戶部覆議止准該省解還銀
三萬兩前來兩廣支用訖今據前因臣會
同巡按廣西監察御史朱炳如議照古田
縣境賊巢結聚負固梗化占據已久弘治
間襲殺總兵叅議正德間攻陷洛容縣治
近年復突劫藩司庫藏殺死方面官員罪

大惡極在法所當必剿但其巢穴深遠盤
據本省兩府四縣之地外連湖廣貴州之
間其中林菁深密蜂窩螳穴百十餘數衆
號數萬地有三厄之險鳥道攀援水有牛
河下流迅馳如箭此皆必經之踞行師進
剿自昔稱難頃據總兵官俞大猷建議謂
須多集兵馬四面合圍奪險通道期於必
克誠勝筭矣然興兵十萬日費千金姑以
半年為期計須二十萬兩軍器火藥戰馬

賞犒諸凡雜費不與焉廣西物力素薄自
來兵餉之費皆仰給於廣東稅課之積往
歲稅銀饒裕數年始一大征故歲供常
有餘而猶得以貯積濟他省之急頻年海
洋多盜商舶既少征收已減縮過半又師
旅煩興招兵增戍殆無虛日此時兩廣之
力何能供十萬之衆備半年之需乎所據
各司道會議前因誠非得已况浙江布政
司除已解外見有銀一十三萬兩四川見

貯亦不下二十五萬兩俱應查照原數補
解前來容臣督率俞大猷等預備糧食召
集兵馬博選將領分定嚮導關會湖貴併
力堵截刻期舉事庶幾有濟若銀不滿數
則兵難多調兵數既少則分布不周大猷
欲計慮萬全遂難紆展臣亦何以施督責
之法望平定之全功乎伏望

皇上憫念遐荒縣治久廢宿寇構患無已 勅

下該部悉從臣等所議將各省原借去銀

兩務先扣足二十萬兩剋期押解至廣西
布政司或梧州府交割以濟緊急軍需之
用俾臣等文武諸臣各得以畢殫犬馬之
力少效涓埃之報不勝幸甚迺若 神武
養威於不殺 節儉弗侈於邊功惜力惜
財警撫四野可招之人漸通險阻之蹇徐
振一旅之師擒獲罪人安其反側謹於隄
防以時鷓剿則固目前苟安之計非日筭
所敢擅議也

明職掌以一政體疏

照得兩粵界嶺海之間諸郡皆盜賊之藪
時時警報在在徵兵舊設提督撫臣關府
蒼梧居中調度緣地方遼濶益以年暮多
事控制難兼嘉靖四十五年該言官建議
兵部覆題奉 欽依於廣東添設巡撫官
一員兼贊理軍務專事該省其兩廣提督
官改為總督軍務糧餉兼撫西省地方是
東省既有巡撫而又使總督得兼制之責

以兵食相資必聯合而後不至於相病也
則廣東地方一應兵馬調遣剿撫機宜與
軍餉盈縮倉庫積儲各衙門大小文武官
員考核賢否及考滿給由皆總督職掌所
係理得與聞撫按官諸凡調遣舉措或題
請有干軍計及舉劾官員等項俱應關會總
督官議處施行此三邊總督與陝西巡撫
事規所所掌親歷與延綏寧夏甘肅各鎮
皆然蓋為地方同心計慮政體成規應如

是也項臣奉命前來將及半年東省地方賊情與治兵理餉等項各該司道凡有呈請及總兵等官以軍務商確俱經悉心整理施行外但巡撫衙門往往不行關會如前奏討浙直四川原借軍餉竟不相聞以致臣與廣西巡按御史朱炳如陷於不知亦復題請前銀將為西省之用又如分巡兵備等官考滿呈詳應准給由或應會本保留俱宜計議定奪今每徑自具

題或移咨吏部並不相聞事皆齟齬在巡撫
李佑銳意幹理功欲求成豈肯故為異同
自分彼此寔緣衙門新設案牘無稽供役
吏書無憑稟白不得不以臆見獨裁信直
行為簡便也臣竊譬諸行舟篙師舵長雖
各盡其力於把持而心志則一張主不二
故嚮往有定大川利涉若使少有參差東
馳西鶩槳槳莫知所適何以收共濟之功
乎此臣所以惓惓願與同心併力而非強

為專擅也已將前項緣由咨行查照外時
下新舊交承誠恐將來承訛襲誤日益肆
遠有妨安攘之計虛節制之 聖書無督

責之實效何以追曠廢之罪也如蒙乞
勅該部再加查議上 請將兩廣督撫衙門

照三邊事體轉行該省巡撫官今後除巡
撫事宜不關軍計外其地方稍重賊情調
遣官兵處置糧餉與文武官員給由應留
應放等項及事干題 請俱要關會議處

施行至於額該供應西省錢糧亦須行令
所司如數依期解運不得遲延誤事如違
聽臣叅劾究治庶職掌明而政體不紊心
志同而地方有賴矣

會留廣東錢糧疏

照得廣東僻居海隅素號多盜然恣肆劫
掠縱橫海上未有甚於此時頃者材道乾
雖已招撫羈縻而曾一本尚黠驚未已轉
餉招兵帑藏告乏亦未有甚於此時緣連

年征調供億浩繁常額不繼搜括靡遺迨
至去冬雷海之戰官兵失利船隻楨棋焚
掠一空近又賊襲省下半載經營海戰之
具盡被毀壞目下計圖滅賊復行打造兵
船添置火器軍前犒賞諸凡用費大約不
下數萬餘兩查得該省布政司庫貯軍餉
銀僅存三萬有零通省各道兵食皆仰給
於此即目前支應猶恐不足而航海舟師
費用緊急該司計屯似徬徨莫知所措臣會

同巡撫右僉都御史熊桴議照理兵必先財用財裕乃可振兵故雖平居無事之時飭兵防除戎器尚不可使有不繼之患乃今舉大事動大衆急切臨敵之際豈可使貯積缺乏以誤重計臣等待罪地方目擊心憂日思請給內帑終不敢發而今將盡括貯積起解則前項置造一不可行雖使孫吳為將不能強枵腹之人出戰又安能舍器具而徒搏無舟楫而憑河哉矧擊

賊於茫茫無定之區帆檣信風遲速不由
人力操縱緩急勝負決於斯頃賊利則力
抗我師敗則隨處遠遁殄滅之期固難逆
料而制勝之策不可踈虞若非大破常格
處給錢糧及時置造終無濟於緊急巨等
冒昧伏乞

皇上軫念東粵寇患已久生民塗炭已極乞
勅戶部亟行查議將御史馬明謨查出該省司
庫應解京銀一十六萬九千餘兩除一十

一萬餘兩盡行起解外數內一項鹽課引
紙價銀三萬四千兩鐵稅銀一萬九千三
百兩督撫贖罰銀四千兩共銀五萬七千
三百兩存留在庫以資彼中用兵之費庶
日下便可料理若曰該省曾經題請准
取浙蜀償還之銀可以待用則遙遙異省
利害不切有無多寡俱未可定何可恃為
旦夕燃眉之救乎此臣等憂思迫切必不
得已之歎悃也

查叅失事將官疏

臣惟賞罰者 朝廷之紀綱賞罰不行雖
堯舜不能化天下故易稱明罰勅法書言
弗迪顯戮凡以法紀不可不飭也况軍旅
之事臨敵勝負決地方之安危將領忠邪
係士卒之勇怯非藉賞罰鼓舞振作其間
則樂生畏死之素習必不可振玩寇殃民
之顯過終無所懲禍亂何時已乎頃自海
賊曾一本叛招潮陽縱橫海上罪大惡極

神人共憤當事諸臣與所在士民恨不
刻殲滅以貽嶺海之安去冬該叅將魏宗
翰王如澄繆印等奉委統領兵船進剿時
賊方畏誅奔命勢未猖獗為力良易而魏
宗翰王如澄乃逗遛不進縱令西逸繼而
追及雷州各又二三其心遲回退縮以致
繆印等兵孤失利為賊擄執隨帶軍器火
藥餉銀船隻盡被搶掠據為賊有廣省數
年預備攻戰之具坐是一空二將失誤軍

機之罪已無所逃矣臣當入境之初叅

題前項失事議將二將先取死罪招由滅賊
贖罪如再不效竟坐重典在巡按御史王
同道叅論大意相同隨該兵部覆題奉

欽依行令戴罪殺賊及調用廣西總兵官俞大
猷前去廣東會同巡撫右僉都御史李佑
及新任總兵官郭成協謀共事整理兵船
以圖再舉在魏宗瀚王如澄自當悉心殫
力奮不顧身勉立奇功以贖前罪今兵船

將集漫不預防致賊襲入省下宗瀚如澄
各統一哨未及對敵輒先退避部下官兵
亦皆望風披靡任賊縱橫半載經營戰船
槓棹復為賊燒燬占據而城外民居亦遭
霍焰附近村落多被傷殘二將退縮償事
之罪又將奚諉玆且宗瀚如澄先次領兵
雷州數俱不足今次宗瀚招兵閩海虛冒
尤多則何以服衆心而制死命夫指畫操
縱之權固在乎主將衝鋒過敵之勇實賴

乎偏裨宗瀚如澄各領官兵兩致挫辱始
則海北兵備之查核已明罪在不貸今復
鎮巡諸臣之目擊難掩法豈能容若不一
示法紀則人將無所忌憚何以懲奸貪誤
事之罪鼓將士勇敢之氣欲以宣

朝廷之威奏蕩平之績人益玩而事愈難矣如
蒙乞 勅兵部再加查議將原充叅將革
職戴罪今又失誤軍機犯人魏宗瀚王如
澄聽臣遵照欽奉 勅諭拿解軍門以軍

法斬首示衆或行巡按御史通將二犯原
領過軍餉招兵官銀比對原行查點實數
扣算侵剋賊銀嚴追還官各項罪犯照依
律例議擬具 奏定奪其餘失事官員容
臣查核另行分別叅 題究治此則懲前
事以振綱紀必如是而後將來之事可喜
也二叅將既已正法所遺員缺仍乞就近
推選素有謀勇慣歷水戰如分守南贛叅
將蔡汝蘭廣東都司署都指揮僉事白麟

紀者調陞前缺今各馳赴統哨今巡撫都御史熊桴新任臣與之協謀區畫要之點賊敢於犯順不過恃其船隻利便及擄得火器漸多故一見官兵銃砲如雨衝突直前我軍遂怯今必欲收功海洋必須多備舸艦添造火器簡閱精兵數各倍之歷以一省全力乃為勝算但念曠日持久緩不及事而各賊復肆派劫於沿海之間禍患益延蔓無已勢不得不亟為追剿之計隨

據總兵官俞大猷揭帖開稱香山澳商船
請欲助兵滅賊及查見造并未完大福船
共有一十九隻加以冬仔及近刷橫江船
整理亦頗有勢福兵已點選二千三百名
澳商亦集二千名本職親督前去追賊收
功可望等因此本官定議用奇憤激於前
而奮迅於後也臣猶慮兵力尚寡謀貴萬
全查有近撫海賊林道乾等原議責令報
效今當併用其力隨行巡撫熊桴及總兵

官俞大猷郭成賁差的當人員重懸賞格
前去鼓舞調發會合官兵分哨出海總計
前項兵船已足破賊制勝矧俞大猷躬自
臨戎身先士卒將士用命成功可望此日
下圖惟安攘期善後事之大略也